

太上洞神三元妙本福壽真經
開明三景章

爾時

大聖祖玄元道德天尊太上老君 在太清仙境紫微天宮
時諸天大帝 諸大天仙 三元帝真 無鞅仙聖 列班朝
元 天丁力士 金童玉女 侍衛羅列 時有通玄至德大
真人出班奏曰 臣聞五太初分 一真造化 兩儀健運
五炁生成 皆由三元宰御 三官統轄 至四維八極 三
界十方 山川海嶽 聖凡人物 禽獸龍魚 草木昆蟲
飛潛動植 盈虛消息 生生化化 無有不屬三元主運
凡居境域 上至帝王 下及兆民 榮顯興衰 富壽康寧
吉凶成敗 禍福災虞 皆屬三元定分 臣愚 不知三

太上洞神三元妙本福壽真經

清微藏書閣

元帝真何因何德 掌握樞機？古今運化 歷劫常存 靈
感報應 善惡公私 毫杪不差 惟願大慈細微開示 使
諸天人明了通達 修崇皈向 奏畢 九拜 長跪 端珪
拱聽

爾時

太上於金光中寂無音響 端然微笑 默視無上文始妙道
天尊 金闕帝君 時帝君默契太上密旨 誠告通玄至德
大真人曰 吾聞無始無元 先天先地 道非常道 而視
之不見 名無可名 而聽之莫聞 玄之又玄 希夷微之
密契 妙兮極妙 虛靜極以冥符 三元潛溟溟泮泮之中
五太胎寂寂寥寥之內 中至真於鴻洞 宰太一於混元
不有不空 無聲無象 妙有無有 卓然如在 真無不

無湛兮若存 強名象帝之先 寓號元皇之始 自太極
肇而三元造化 從混沌鑿而一炁生成 三極建中 二儀
定位 帝宰乎綱維 神御乎樞紐 故天始凝水 地統其
源 氤氳混一 元炁中融 化鈞密運 生意綿存 故三
元帝君職任宰御 巡歷考校 凡仙官真人 天神地祇
水母三界 萬靈君臣 人物善惡 悉主隸焉
天官誠運章

原夫天官體精一而中正純粹 主健運而元亨利貞
雷震風飄 雲行雨施 有無無有 消息如環 鈞芒陶造
化融一炁 生生不窮 升降屈伸 運四時綿綿不息 正
令行乎少昊 至仁發乎暘谷 鼓舞仁風 草木山川成秀
麗 化融元炁 飛潛動植悉沖和 孔德成莫大之神功

太上洞神三元妙本福壽真經

清微藏書閣

玄仁變無窮之妙用 主天曹大生之柄 宰天府元化之機
帝德無方 真功罔極 凡天下山嶽府君城隍社令 主
職攸司 一切不正神祇君臣人物 悉屬考校 黜陟賞罰
焉

地官厚本章

道乃萬物之奧 坤為群類之基 地官融五太于窈窕
冥冥之中 坤宰育萬有于化化生生之內 上承天道 體
至柔而動則剛 中蘊元黃 用極廣而微之博 包括八荒
十壙 乘載四海九州 含萬象而化光 全生生之妙體
貫九泉之脈絡 總密密之玄機 山澤通炁 會風雲于幽
谷 地天妙合 激雷電 干太空 東至扶桑 西及細柳
南極南維 北屆北都 中載岱嶽名山 上御崑崙仙境

推盪陰陽之復姤 晦彰日月之夷升否塞 則成冬之收
藏泰亨 則發春之化育無情有情之物 總理中黃巨象
微相之形 咸生厚土 故后土功高莫極 中帝德厚無疆
凡人素履行藏 悉承厚載之德 死生安止 咸庇含弘
之恩 凡世問九州八荒山川原野不正神祇 妖魔魍魎
幽爽猖亡 為人民患害者 悉屬考校罰滅 及無情有情
生成長育 悉隸造造化焉

水官歸源章

夫水官者 大道一源 弘通萬派 聖德淵澄于滄海
神功寂湛于瑤池 深潛莫朕之鴻濛 沖漠未鑿之混沌
晶茫莫測 滔騰混于太空 澄澈無涯 靜止息于先地
能柔能順 用莫之既 可方可圓 深不可量 實滿而

太上洞神三元妙本福壽真經

清微藏書閣

不自盈 往來而不失信 其質柔而體至剛 其性下而公
用平 其海藏也 韞金玉珠珍 其源流也 育鯤龍魚蜃
細無不入 大無不包 神其變化 則傾山倒嶽 攻其
堅強 則貫金透石 道濟天下 載萬斛之巨舟 光澤世
間 印千川之皎月 體之若此 升降自然 故上善若水
利萬物而不爭 至神如天 歷千古而無變 汪洋清潔
溥博柔和 與天地大通 共虛空同體 滋生萬物 澤
育群生 奈凡流莫曉洪澤之恩 徒為望洋之嘆 凡江海
河瀆 川源溪澗 井谷潭池 龍宮海藏 一切水淵神母
毒龍蛟蜃 魚鱉水怪諸妖 與人為害者 咸隸考校伐
戮焉

三元體妙章

夫先天太玄至真混元中黃之元炁 洞淵清澤之元精
暘谷青華之妙道 三元若此 人亦如然 若夫世間善
信賢良 夙植功德 得聞如上妙微 冰消幻妄 清靜身
心 淵毓元精 綿息元炁 寂照元神 混神炁精 沖凝
天谷 復無極至真之妙道 劫運長存 獲無量壽 受無
量福 其聖功玄德 不可思議 吾代奉太上慈慧妙音
宣揚重說三元咒曰

大哉玄元始 妙道自然然 真陽冥赫赫 真陰密玄玄
真宰沖漠朕 極肇生諸天 元皇析五太 建極主三元
三元融五炁 造化人坤乾 三才氤氳混 萬物生生焉
惟人最慧貴 真性體高天 無為至清靜 秉昇道德全
純粹如玉瑩 剛明體金堅 如坤柔厚德 如水善方圓

太上洞神三元妙本福壽真經

清微藏書閣

性本無生滅	心生成倚偏	四非縱八識	愛惡生妄心
苦海浪翻復	滾滾喪真源	太上憫慈救	強道作法船
濟人登道岸	無柰人狂顛	渾流無定止	甘心墮幽泉
輪回諸苦趣	長劫業火然	暴棄不自悔	執昧深可憐
心息無生滅	心清罪業蠲	心空超八識	心淨絕諸愆
心純無妄偽	心明光慧圓	心通無障礙	心了樂象先
但肯回心正	火中生金蓮	迷昧為下鬼	明悟登上仙
寶固精神炁	三元復本然	無量大功德	妙微難言宣
洗心志專精	齋心至敬誠	誠誠中應感	自然咸利貞
不空真妙象	無色無臭聲	神化妙難測	寂明中洞明
釋一切罪厄	消一切災迤	行止常清吉	福祿壽康寧
三元微妙道	如意大光亨	稽首誠不二	敬信力尊行

心君常安泰 天下永和平
三官慈誓章

時

三元三官帝君聞是經咒 即九禮太上道前 端珪而誓曰
臣然主任三元 巡訪考校 常清靜體道 無為自然
亦不自知己美 今聞如上法音 誓願傳教世間 凡良善
男女 有能受持三元齋戒 澡沐身心 誦味是經 敬持
真咒 精進力行 如太上敕命 普告諸天仙聖 三元官
曹攸司 三界十方神祇等 如有世間持誦是經咒者 隨
其誠意 即為赴感護衛 拯救水火兵盜病患 生產船划
苦厄災傷 宥釋夙生見在一切冤愆罪障 保其精進無上
至真妙道 即令夙疾普消 精神清健 形質康安 增延

太上洞神三元妙本福壽真經

清微藏書閣

福壽 奏畢再拜 是時 通玄至德大真人與諸天天帝天
仙 三元仙聖 無鞅仙真 同聲讚詠 歷劫未聞如上妙
旨 得悟三元大本 三官願力 皆真歡至樂 天樂雍肅
清音妙韻 天花天香馥朗 十方仙聖神真恭禮 各復
元所 普願人天敬信奉行

太上洞神三元妙本福壽真經竟

後序

本元天性 清寂虛明 了無慾情 安有善惡 心念
一起 邪正區分 嘗聞上古君臣民物 皆真真實實 朴
朴純純 初無貳心 咸有一德 自然三元融暢 一性慧

靈 中古以來 尚機智聰明 流心情妄 貪嗔好勝 嫉
妒好爭 詐偽奸邪 驕奢欺昧 了無覺知 終不改悔
人慾甚而天性喪矣 致冤枉罹禍 良善受殃 苦屈無伸
以其上下邪氣交征 感生疫癘兵兇 飢荒奸盜 鬼神
陰毒 魔怪興妖 災害並生 以至病疾傷殘 性命天祈
苦哉！我太上慈憫 上帝降衷 職任三官天曹府司
每遇三元巡訪考校 昭彰功罪 伸理曲直 赦罪救苦
解厄拯危 有功德者 賜福祿壽 以至子孫賢哲榮顯
作罪業者 罰戮勦除 以至子孫愚頑凌替 聖明公直
報應如響 自然而然 萬無一失 此經太上妙玄三元道
德大體妙用 聖力神功 俾夫志士修真明本 反朴還淳
復上古之玄風 證至真之妙道 僕受授古本 校正分

太上洞神三元妙本福壽真經

清微藏書閣

章 使夫易曉玄理 精明道心 上祝皇圖永固 聖壽遐
昌 次願善信齋心誦持 誠意修奉 庶不負太上聖慈
道濟天下 三官願力福祐人間 仲庵王居士一見誠誦喜
躍 發心勸緣繡梓 普化人天 同歸正道 豈小補哉！
泰定甲子陽至日 金欄紫衣玄一高士臣苗善時頓首敬序

天運辛卯年酉月正一天師清微弟子洪鼎堅羅大英恭錄彙編